



# Kwakkerte - Kroniek

*Leef Kwakkerte, Kwekerkes en Koeleköp*

*VV de Kwakkert veertj aankomendj vastelaovessezoen zien 5 x 11 jaorig bestaon. Eine mijlpaol woeë wae gaer effe bie stil wille staon.*

*De aankomendje waeke kintj gae in 't Heitser Blaedje eine trökblik op 55 jaor vastelaovendj verwachte, de Kwakkerte-Kroniek.*

## Äöver vreuger ....., waat we oug nog deeje

Volgendje waek begintj op de elfdje vanne elfdje 't nuje vastelaovessezoen. En den begintj vöör vastelaovesvereniging VV de Kwakkert 't jubileumjaor, 't jaor woeë-in wae 't 55 jaorig bestaon vere. Daomèt eindigtj ouch dees Kwakkerte-kroniek, bedoeldj as vöörbesjouwing op 5 x 11.

Vandaag dus de lèste aaflevering van "äöver vreuger ....."

In "äöver vreuger....." höbbe wae 't gehadj äöver ein stökske gesjiedenis, de ieerste gezèt, de Prinselikke Hofkepel, de Groeëtvorst en äöver de BCL's die wae höbbe georganiseerdj.

't Waas ein keuze oet alles dèt ane orde haje kinne kómme. Want vöör 'tzelfdje geldj haje wae get kinne sjrieve äöver bevöörbeeldj de ieerste Prins, de Bóntje Aovendj dae later Heytser Revu waerdje, äöver de Jeugdprinse of de gesjiedenis vanne Koelekop. En wae haje ein artikel kinne wieje aan de 4 jubileumprinse Cor I, Cor II, Henk III en René II. Of ane optocht, of missjien de versjillende bals die door de jaore haer zeen gewaestj zoeë-as 't Aod-Wieverbal, Cowboybal, Middestansbal, Gehuudjebal, Borebal, Riobal en Bouwersbal.



En es 'nne kieër oetlègke wie de Prinsekeuze toet standj kumtj waas missjien ouch neet gek gewaestj. Of waat d'r allemaol gedaon waertj óm eine nuje Prins vöör te bereije en wie de proklamasie waertj gemaaktj.

Mèt anger wäörd, genóg óm äöver te sjrieve. Óm nog mer te zwiege äöver zoeë-iets as de aafsloetendje Waever op 't kèrkplein of de Borebroelof (en waat de Aod Prinse doon asse dao op aartje gaon). Mer ouch de Aod Prinse klub en häör halfvastefieëst waas ein good ongerwerp gewaestj.

"Äöver vreuger ....."eindigtj mèt detgene waat nog kumtj. En waal mèt 't 5 x 11 jaorig fieëst det op de elfdje vanne elfdje begint mèt ein

groeët veurwerk op 't gemeindjplein. Daonaeve waertj noe alvas ederein van herte genuuedj vöör 't jubileum-fieëst op zunjigmiddig 3 jannewari. Det 't ein vastelaovessezoen moog waere óm noeëts te vergaete. "Äöver vreuger ....." winstj 't uch.

Waertj missjien vervolgdj äöver 11 jaor